

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma’n restricted area permit leh protected area permit chu khualzin ten awlsam zawka an hmuh zung zung theih na tura hmalak a ni a ti.
- 2. Home Minister Pu K. Sapdanga hovin Mizorama rel lo lutin nghawng hrang hrang a neihte vawiin khan thlirho a ni .
- 3. Prime Minister Narendra Modia leh UK Prime Minister Keir Starmer te chu vawiin khan Mumbai ah an inkawm
- 4. India leh Australia te chuan ralthuam siamchhuah kawngah inremna an siam.

<><><>

TRAVEL FEST : CM

Chief Minister Pu Lalduhoma’n ram dang atanga lo zin, foreign tourist te permit bik, restricted area permit leh protected area permit chu khualzin ten awlsam zawka an hmuh zung zung theih na tura hmalak a ni a ti.

He thu hi vawiina Mizoram Travel Fest 2025 ni 2-na Aijal Club-a neih a hmanpui na ah sawiin Pu Lalduhoma chuan ram dang nena inrina, international border hmuh ve hrim hrim chak mi tam tak an awm avangin Ministry of Home Affairs-in Restricted Area Permit leh Protected Area Permit a pek thin chu khualzin ten awlsam zawka an hmuh zung zung theih nan hma an la mek a ti a, Mizoramah khualzin tam zawk hip lut turin tan lak a ngaih thu sawiin hnamdang khualzin hrang hrangte khawsak pui thiam a tul a ni a ti.

Mizorama khualzinte chu dan ang taka lo lut, an haw a hun a haw leh mai tur an nih avangin hlauh tur leh hmuhsit tur a ni lo a ti a, Mizorama an cham chhunga sum leh pai an senral chu Mizo mipuite sum lakluhna a ni zel tawh a ti a, khawvel ram hrang hrangten khualzin ngah tura thapui an thawh laia lo hlauh chu thil dik a ni lo tih sawiin, khualzin tam zawk hip luhna kawngah hmasawwna a awm theih nan, lirthei chuan man, ei leh in man, zanriah man leh thil dang man te chu to lutuka chhiar loh tur a ni a ti a, Aizawl khawpui chhunga taxi fare mumal lo lutuk te chu veiawm a tih thu a sawi bawk.

Byte: Chief Minister

Chief Minister chuan Inner Line Permit (ILP) pawh changtlung lehzuala kalpui tum niin, tunah hian online kaltlanga tih theih turin an buaipui mek a, hemi hmang hian tutenge an ILP tawp tawh hnua Mizorama la awm tih te chu awlsam takin an hre zung zung thei tawh dawn tih a sawi bawk a ni.

<><><>

NH ROAD CONDITION WORSEN

Tunhnaia ruahsur chuan Aizawl leh Silchar inkar kawngpui, a bikin Sairang leh Kawnpui inkar kawng chhia a tih chiau nasat leh zual avangin lirthei tangkhang a tam leh tawh hle.

Kan corr thudawn danin, Darkar 36 kalta chhung khan Kawnpui atanga Aizawl pan bungraw hrang hrang phur lirthei 437 chhuah a ni a. Lirthei ruak, Sairang peng leh Mualkhang/Khamrang inkara tangkhang Assam lam pan tur chhuah a ni lo thung a, hemi hun chhung hian Khamrang a Assam lam pan truck ruak 587 chu an tangkhang mek a ni. Kawnpui ah Aizawl lam pan bungraw phur tangkhang 35 a awm bawk a, heti hian nimin lama ruah a sur avangin Sairang leh Kawnpui inkarah lirthei 622 a tangkhang mek a ni.

Thu dawn danin Sairang leh Kawnpui inkar kawng siam that tawh chu a chhiat leh nasat tawh em avangin kawng a nal em em a, truck ruak a kal hlei thei lova, tlu leh tang an tam thei hle a ni.

Akashvani Aizawl zawhna chhangin, Mizoram Truck Driver’s Association President Pu H Laldingliana chuan Mizoram khawthlang lam kawngchhiat avanga tun thla ni 2 atanga Buhfai phur truck tlan lo chu an la tlan lo chhunzawm zel a, kawng hi siam that la ni lo mah se tlan tawh lo tura thu an chhuah hmaa kawng laka tangkhang tawh buhfai phur truck 5 te chu nizanah chhuah tir an ni a, Rawpuichhipah an la awm mek a ti a, Khamrang lam kawng pawh a chhe hle tih sawiin, zan 3 chu lirthei ke 6 nei an chhuah tawh a, lirthei ke 10 nei chin pheih chu an la din tir vek a ni.

<><><>

HOME MINISTER

Home Minister Pu K. Sapdanga hovin Mizorama rel lo lutin nghawng hrang hrang a neihte vawiin khan thlirho a ni a. Sairang Rel Station a Inner Line Permit (ILP) pekchhuah a nih dan leh document nei fello chungah luh ruk kawng a awm em tih Aizawl DC leh SP tangkawpin a hmunah chiang zawkin lo finfiah se tih a ni.

Kolasib SP Pu David H. Lalthangliana chuan ILP pekchhuah buaipui tur hian Bairabi-ah mi 8, Hortoki-ah mi 2, Kawnpui-ah mi 2 leh Mualkhang-ah mi 2 duty dah an nih thu a sawi a. Kolasib chhunga rel station-ah bik hian ILP 38 pek chhuah a nih tawh thu a sawi a. Sairang thlenga rel service a awm hnu atangin Vairengte a ILP

pek chhuah leh Inter-state sumo service chu zaa 30-40 vel laiin a tlahniam niin an hriat thu a sawi bawk.

Aizawl Addl SP Pu Lalringliana Pachuau chuan Rel station hawn tirh atangin ILP pekchhuahna counter pali(4) siam a ni a. A tirah police pariat (8) duty dah niin tunah hian paruk (6) dah belh leh an ni tawh a ti a. Nimin thleng khan ILP 4,064 pek chhuah tawh a ni a. Kutdawh pali (4) leh ILP nei lova Mizoram lo lut mi pali (4) man chhuah an ni a, heng mite hi thawn let leh an ni. Hei bakah hian Sairang Zero-Point ah a khat tawkin ILP surprise checking neih thin a nih thu a sawi bawk.

Meeting-ah hian Chief Secretary Pu Khilli Ram Meena, IGP (Headquarters) Pu H. Ramthlengliana, Home Secretary Pu Vanlalmawia Renthlei, Transport Department Secretary Pu Zosangliana te bakah Aizawl leh Kolasib District a sorkar official pawimawh te an tel a ni.

<><><>

MZP

Mizo Zirlai Pawl chuan Sairang rel station chu station a nihna tur ang la nilo tih hre reng chungin Prime Minister chu hawn tir a ni an ti a, Mizoram sawrkar la inpeih loh zia pawh chiang takin a hmuh theih a ni an ti.

He thu hi vawiina Aizawl Press Club-a thuhthar thehdarhtute an kawmnaah MZP General Headquarters President Dr C Lalremruata chuan sawiin nimin zinga Sairang Rel Station tlawhin Inner Line Permit (ILP) pek chhuah dan zirchiangin a hmunhma te an enfiah a ti a, MZP chuan ngun taka an zirchian hnuah Sairang rel station chu station a nihna tur ang la nilo a, hei vang hian Mizo mipui ten harsatna an tawk tan mek a ni a ti.

Guwahati atanga Sairang Rel ticket a full reng laiin ILP pekchhuah a tlem hle thung a, hei hian ILP neilo a bi bo tam tak an awm tih chiang takin a lantir tih sawiin September ni 14, atanga October ni 7 thleng khan ILP 3,852 pekchhuah tawh a ni a, kutdawh thawn kir hi 6 an awm tawh tih an sawi a, Sairang rel station an tlawh lai pawhin ILP neilo a a ruka chhuah tum mi 30 vel lai an man chhuak tih a sawi bawk.

Byte : MZP President

MZP President chuan Bairabi leh Sairang inkar a station pathum : Hortoki, Kawnpui leh Mualkhang lamah pawh rel a tlan muang deuh a, mi tam tak an chhuk ni an hriat thu a sawi a, heng hmunah hian police duty awm ve mahse tam tak chu ILP neilo in an chhuah ngei an ring a ti a. Mizoram-a hnamdang lo lut te chu Tourist ang veka ILP pek an ni a, an lut lam chhinchhiah ni mahse an haw lam chiang taka chhinchhiah a nilo thung a, hei hian Mizoram-ah awlsam taka lut a, cham hlen ta tam tak an awm dawn tih a ti chiang hle a ti.

Sairang rel station an zirchiannaah hian ILP check leh pe chhuaktu Mizoram Police duty an indaih lo hle a, ILP pekchhuah chu manual a tih vek a nih avangin, a la fel fai tawk lo hle a, CCTV engmah vuah a la awmlo a, Gate mumal tak siam a la nih loh bakah hungna a tha tawk lova, X-Ray Baggage Scanner khawl pawh hman theih a la ni lova, Mizoram chu dry state a nih angin, Excise & Narcotics duty dah an ni lo bawk a, Parking area a fel fai lo hle an ti a, Station a duty zawng zawngte chu training pek ni se an duh thu an sawi bawk a ni.

<><><>

CEO

Chief Electoral Officer Dr. Lalrozama chuan Dampa (ST) Assembly Constituency Bye election neih tur chungchanga hriattur pawimawh inhrilhhriatna hun NGO-te a hmanpui a.

CEO Dr. Lalrozama chuan inthlanna lo awm tura hriat tur pawimawhte sawiin, Mizoram pum huap inthlanna ni lova Constituency pakhata bye election neih tur a nih avangin Model Code of Conduct-in a huam chinah fimkhur a ngaih thu a sawi a. Tun tum inthlannaah hian ECI-in a rel angin polling station zawng zawngah ‘webcasting’ hmangin vote thlak lai endik a nih dawn thu a sawi bawk a. CEO chuan Mizorama inthlanna zalen leh dik neih a ni thin chu NGO-te hmalakna leh sawrkar nen thawhhona tha an neih vang a ni tih sawiin, Election Commission of India pawhin hemi kawnga Mizorama NGO-te thawhrimna chu an hriatpuiin lawmawm an tih thu a tarlang a ni.

Meetingah hian MPF, CYMA, MUP, MHIP, MKHC aiawhte an tel a. NGO-ten inthlanna felfai leh tluang zawk neih a nih theih nan rawtna hrang hrang thlenin, thawhho dan tur hrang hrang an sawi ho bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia leh UK Prime Minister Keir Starmer te chu vawiin khan Mumbai ah an inkawm. He inbiaknaah hian hruaitu pahnihte chuan eibar zawinna kawnga thawhdunna tihchak an rel a. Zirna, technology, ralthuam leh mineral pawimawh bikahte thawhdunna uar leh zual turin an intiam a. Pu Modia chuan India leh UK te chu thawkdun awm tak an nih thu sawiin mipui rorelna democracy, zalenna leh dan lalna ram an nih thu a sawi a. Khawvelah remna leh muanna a awm zel theih nan leh eibar zawinna kawngah hausakna thlen zel turin an thawkdun tih a sawi bawk a ni.

<><><>

ECI

Election Commission of India (ECI) chuan Bihar Assembly inthlan leh Assembly by-election neih turahte Artificial Intelligence hmanga an ep lam party te bei lo turin Political Party tinte a hriattir. He inkaihhraina hi Model Code of Conduct ah pawh telh a ni a. ECI chuan hetiangai AI dik lo taka hmanga dawta thu thehdarh emaw milem leh video hmanga social media lama inbeih chu khap tlat anih thu a sawi a.

ECI chuan social media a political party te chetvelna uluk takin an vil reng dawn tih a sawi a ni.

<><><>

INDIA & AUSTRALIA

India leh Australia te chuan ralthuam siamchhuah kawngah inremna an siam. Australia tlawha cham mek Defence Minister Rajnath Singh leh Australia Deputy PM leh Defence Minister Richard Marles te hriatpuiin he inremna hi ziah a ni a. Pu Singh leh Australia Defence Minister Marles te hi vawiin khan Canberra ah an inkawm a. Australia leh India ten ralthuam lama an thawhdunna hrang hrangte zau takin an sawi dun a. Raltuam siamna industry te, cyber defense, maritime security leh an chhehvela harsatna awmte an sawidun a ni.

<><><>